



著老書堂集卷之五 乙亥

臨潼 張世進

軼青

正月六日過讓圃

路向城陰轉人當歲首閑偶然攜竹杖復此叩柴關殘  
雪荒苔上疎梅落照間禽聲多樂意入耳覺春還

晚清軒觀鶴舞

羣鶴有道鶴乃馴清池白石全其真稻梁恩重無以報  
雙雙學舞交繽紛初舒修頸作清唳漸鼓兩翅騰長身  
高纜數尺僅離地勢若一往將入雲迴風流雪那足擬  
鳳踰龍躍斯爲倫璩璋豈類羊公宅振迅恍依吳市門

梁簡文帝舞鶴  
詩振迅依吳市

三山萬里豈無意未忍決起翔高旻倦來松

逕踏白月還歸竹柴棲黃昏君不見白家楊枝不共老  
韓家柳枝曾踰園筵前長袖誰久在何似胎禽戀主人

元夜山館聯句

佳節天涯喜盍簪朱稻孫山齋四度復聯吟馬曰瑄地

分吳越皆知已張世進詩壓齊梁是雅音馬曰璐春月

初圓花照夜陳章清歌不斷酒盈襟閔華燈前底用看

霜鬢陸鍾輝行樂年年共此心洪

東樓于湘

拋却吟朋靜掩扉近聞稍與藥爐違原思自昔貧非病  
昭略而今瘦勝肥未共雪中嘗臘酒好來花下試春衣  
叮嚀強飯非無意年少清才似爾稀

梅花下作

東皇著意弄春妍輕煖輕寒十日天莫與梅花較身世  
梅花遭遇有今年

憶舊居玉蘭有序

舊居園中玉蘭一株高二丈圍三尺許春時作花  
不下萬朵自我不見二十年矣今年二月偶於牆  
外見之追憶疇昔花下之樂渺然如隔世事因爲  
長句一首不自知其言之悲也

老屋年年玉樹新弟兄攜酒樂青春明蟾鬪色來初夜  
煖日烘香散四鄰篋底尚留相賞句花前別換一番人  
出牆枝好爭看處獨有衰翁暗愴神

賦得一片花飛減却春

莫把媽紅片萼輕春工也費翦裁成才經少女微飄處  
已露東皇欲去情看作尋常憑酒客暗將消息報流鶯  
恰如詩老皤然鬢始自星星一兩莖

集抱山堂東泚江

高興飛揚勝少年如何閑度杏花天及今風煖偏支枕  
却笑春寒早放船泚江湖上看  
梅因抱微恙示疾維摩原偶爾閉門正  
字太蕭然此閒亦有重簾護拄杖還來共擘箋

晉樹亭

輪囷鴨脚小亭隈聞說根從典午栽黛色遙連仁祖檜  
春光先占法曹梅不隨江左風流盡曾見東山絲竹來

落子何年復成樹而今已是棟梁材

題畫三首

王石谷花溪漁隱圖

權拂溪紋燕尾斜紅桃花下綠汀沙晚來莫問維舟地  
處處春風處處家

惲南田紅薇圖

嬌嬈不肯嫁東風簇錦裁綃別樣工記得綠陰如幄處  
石榴紅罷此花紅

陳原舒秋葵圖

頭冠金盞不風流難寫嬌黃一種秋斜界藤箋還小疊  
曉來輕展晚來收

熙熙人物滿春臺貌出長安錦繡堆料得東風花柳下  
此時未有杜鵑來

幽蘭居士記東都活現華胥遜此圖任寫汴河無限好  
可知浙臉愛西湖

一夜春泉漲御溝翰林真蹟杳難求帝城風物依稀在

猶幸葫蘆樣本留

圖為北宋翰林張擇端畫後歸嚴分宜家嚴敗圖書盡入大內朱箴菴意欲盡得之當事遂奏請發朱著令上

價臨發一小璫知此圖價重遂竊攜之適當事者至璫亟藏御溝石鑪中是日忽大雨溝水驟長沒罅越二日水退取之則已糜爛不可復理矣見明詹景鳳

東圖元覽

懈谷招賞玉蘭席上各賦五七言送朱稼翁

暫歸秀水

花下酒如油花前人去留同看木蘭樹獨上木蘭舟

山館此時共醉蓬窻明日孤吟好向江南江北較量春  
淺春深

經旬小別漫欵欵相待抽帆四月初聞說鴨餛飩正好  
莫貪鄉味誤鱖魚

飲含雨亭東懈谷半查

一片菜花中天桃遠近紅醉吟忘是客培養愧無功老  
去憐春色遲來怕曉風穠芳須亟賞為報主人翁

斷鍼吟為李景山母氏作

中道喪所天教子若嚴父弗辭十指勞篝燈佐勤苦每  
當一鍼折輒向小函貯積少漸成多至不可勝數試思

累百千所歷幾寒暑鍼斷不可連學廢不可補嗟此留  
鍼心何異斷機杼孤兒守青編慈母歸黃土至今雒誦  
餘開篋淚如雨我聞古學人文行恒相輔子也孝且廉  
一介無苟取因知斷鍼時所勗非訓詁願將寸鐵微子  
孫世藏弄莫謂少鋒鋟千秋刺心腑

鐵獅行

蕃釐觀前鐵獅子或言禱之病良已轉相附會轉神奇  
云福可邀禍可弭遠近遞招呼男女紛拜跪初來攜紙  
錢再至陳牲醴有司禁之衆弗止勢難一一施鞭箠無  
計但將獅子毀伍伯掎擊手如風婦孺旁觀鼻流涕祈  
求更有後來人却視鐵獅已亡矣不怪言者妖不笑信  
者鄙多事反將官長詆犀有通象有齒厥身戕賊皆由  
已獅兮面目空猙獰無妄之災誰所使請君來看擊殘  
軀本是塊然頑鐵耳

寄懷梅泚

朝朝雲樹隔江看何事春來挂席難不是願君長作客  
應知無計老漁竿

雨過西疇二首

出郭前期在難辭冒雨來連岡橫宿霧隔水殷輕雷門  
掩陰陰樹庭封漠漠苔草堂寬十笏前後洛花開  
花已十分齊壺觴正可攜雨疎留色在雲重壓香低啼  
鳥芳林外斜陽小閣西筍輿歸路穩不用怯春泥

題王穀原比部龍湫宴坐圖

擾擾棲人寰無處滌塵土鴈山飛瀑前真是洗心所震  
耳喧奔雷灑面濺寒雨宛挂千尺冰盡祛六月暑君本  
廊廟身愛作林泉主寫真煩畫師但與蒲團伍奇境象  
外傳不遺現豪楮必欲問龍湫龍湫在靈府

懷謝山

幾載一相見相望復海濱別來春又夏歸去病兼貧欲  
竟千秋業休輕七尺身天心扶大雅應不困斯人

過故將軍第

甲第荒涼半作墟將軍貴盛舊何如庭階駢立千夫長  
閭巷高容四望車此日猶呼侍中宅幾時重贖鄭公居

白頭愁見歌鐘地雨後牆陰種野蔬

送穀原之金陵

摩詰詩篇眼內稀才欣相見復相違交聯老後難爲別  
帆指江南不是歸芍藥已看邗上好鮭魚更試石城肥  
惟應惆悵青溪畔邀笛風流兩度非

其地實意已官遠方因寫青溪邀笛圖  
要同人作詩以紀其事故於落句及之

穀原嘗於秦淮水閣邀  
商君寶意作三弄後過

江村新夏

柴扉六枳籬占斷江一曲門前稻始秧舍後筍成竹近  
階波渺渺隔岸山簇簇木榻枕書眠水風吹夢熟起視  
清潮平坐對白鷗浴此境在人間胡爲溷塵俗

乙亥初夏重晤息翁於山心室用前韻

別來兩度閱春秋又向韓江挂席遊  
穎上尋盟同趙槩山陰乘興異王猷  
尊前談笑神猶旺卷內詩篇力更遒  
莫趁南風吹五兩匆匆不爲故人留

哭泮江太史四首

逆數交期淚滿膺黑頭直到雪鬢鬢  
當時本是忘年友邇日真成耐久朋  
先生長子十四歲一去江湖聽夜雨  
重攜筆硯共秋燈中間多少升沉事  
說向靈筵總不謬

聲價當時重木天卅年林下作閑仙  
江山風月常爲主臺閣文章且避賢  
身後憑誰傳柏匱生前已欲賣平泉  
從來未見攢眉態脫屣人間亦灑然  
誰向騷壇更主盟飛揚清興想平生  
但嫌高會經旬斷

不怕長篇頃刻成畏酒時時傾茗汁  
隨身處處帶楸枰向來只作尋常看  
事後追思默愴情隔夕殷勤折柬邀  
吟魂忽逐曉風飄可憐頭白身難恃  
更比蒲黃酒易消先生於五日逝前夕猶有解粽之約過隙光陰知有盡  
名山事業計無聊從今但到天中節  
又爲先生賦大招

倚杖

蒼茫斜日下倚杖背柴關身是歸來好  
天容老去閑塵中空白髮望裏即青山  
指點巉巖處何如世路艱

對茉莉花有感

記得紗幮靜夜籠釵梁開遍玉瓏璁  
萊妻髮禿楊枝去花在月明風露中



五月既望小集著老書堂待月聯句

新篁闌檻欲黃昏

陳章

枝上啁啾宿鳥喧

張世進

已被

星河催卷幔

王藻

不教燈火照開尊

張四科

遙知東海

騰千尺

章

乍見西牆抹一痕

世進

難得閑人如我輩

藻

清愁莫向醉中論

四科

雨餘

耳畔斷簷聲欲晴還未晴  
水消階面出葉燥竹梢輕  
乾鵲喜歡態斜陽老大情  
詩書是吾事須趁紙窓明

六月望夜讓圃坐月限十四鹽韻

終朝枯坐情不悅  
建瓴之水懸高簷  
杜陵茆向屋頭捲  
裴亮宅從牀下淹  
自春徂夏凡六望  
清光五度雲中潛

今晨雨聲不到枕  
起視曦影初入簾  
小園咫尺頗易涉  
靜友三兩何須添  
一觴一詠意已足  
卜晝卜夜歡難兼  
林閒支頤待歸鳥  
樹頭瞥眼騰涼蟾  
明珠久悶吐蚌殼  
古鏡長封開象奩  
結璘曩來匿何處  
豈有墓叻能閉箱  
千里故人返鄉國  
七年痼疾逢鍼砭  
吾曹見月同此快  
管鑰忘却司城嚴  
筍輿蠟屐姑緩試  
酒杯詩筆堪重拈  
南樓清嘯有庾老  
承天散步傳蘇髯  
昔賢弗忍負佳月  
未聞取用傷其廉  
況茲圓魄久睽別  
肯教寂寞沉西崦  
人生雖若處禪蟲  
我身久異上竹鮎  
忙閑有時難自料  
陰晴明日誰能占  
良宵且作開口笑  
愁嘖莫上雙眉尖

哭懈谷三首

不信浮生內茲晨遽哭君誰教富才調無計避辛勤悲  
喜多年共存亡一旦分故人餘幾輩今又痛離羣

山館花開日行菴葉落時孤燈明竹院一老撚霜髭此  
境恍如昨伊人不可追白頭吟侶在累月嬾裁詩

自昔叨知契文章臭味通敢居三益列不在五交中愁

對孔平仲謂半查期生鄭小同嶰谷姬人孕已四月哲人身後報天道

豈夢夢

哭嶰谷詩成復係一絕句

賦就傷心句秋蛩語共哀長箋空寫去無復報章來

題玉井洞庭待月圖

淼淼太湖水中有明月坡明月出常晚四面峰巉峩幽

人暮延佇徙倚長松柯有酒肯遽飲有詩且緩哦空巖  
無漏鼓靜夜聞鳴鼉少焉大圓鏡飛出東山阿萬頃失  
銀浪一色浮金波空明互激射高下相盪磨久立豈不  
倦所得良已多涼宵若早睡如此水月何

秋日過行莽

虛堂重到不勝情舊是詩人手築成閑醉閑唵難再共  
秋花秋草自長生當時地主延賓客今日園丁管送迎  
料得弟兄連案處卯君從此嬾經行

倚樓

小樓城市外暇日好躋攀眼底村邊樹意中江上山雲  
隨高鳥去人共夕陽閑幾許清秋思闌干一曲閒

秋庭閑坐

西風來幾日清絕廣庭閒疎柳若高士低花如小鬟秋  
能令人淡老合讓身閑自得跣趺趣蕭然晝掩關

讓圃雨後秋花盛開成一絕句

拄杖來聽落葉聲柴扉初啟照人明秋霖不肯輸春雨  
也灑庭花五色成

八月七日小集讓圃時王太守孟亭至自金陵

蔣孝廉秋涇至自秀水三首

結伴閑尋古寺邊蕭疎庭院次寥天憑闌遍把秋花數  
羨殺叢中老少年  
石城艇子駕湖棹兩地雲帆次第開好是淮南秋雨夜

故人都向鴈前來

三百枯棋酒一尊消磨白晝到黃昏隔牆亦是尋詩地

黃葉青苔嬾叩門

謂解谷行菴

聞全太史謝山凶問

凶耗遙傳自海濱歸時病骨記嶙峋若教藥餌難徵效  
政恐文章少替人伯道無兒誠可痛

謝山止一子  
亡於今春

東坡已

死或非真可憐老眼昏如霧禁得風前灑淚頻

哭樓于湘

清晨聞叩門長鬚報君死斯人無死法厥疾無生理倘  
荷彼蒼憐或希勿藥喜友朋屬望心今日長已矣寡妻  
方有身嬌女才毀齒身後竟如何哀哉樓次子

唱和豈不樂所憂傷爾生而君弗自逸慘淡同經營時  
於推敲際頻作欬嗽聲人同秋竹瘦句比寒潭清但得  
假年歲何難臻老成此才忽中折誰爲後來英  
屈指入夏來三度哭詩老君年未四十胡亦隨秋草俾  
爾秀且文自合貧而夭厚福愚乃邀慧業天所寶倘作  
再來人須向冥司禱願不識一丁富貴還壽考

秋日寄南圻棲霞山中

不到棲霞久清遊憶往年深松盤古磴亂石漱秋泉想  
對中峰月頻遲午夜眠山中紅葉信休惜隔江傳

遊金山

曉趁回潮半日程瓜州城下大江橫山從波浪中間出

帆繞樓臺四面行閑倚石闌看鳥度靜聞齋鼓認鼉鳴  
斜陽纔墮蒼茫裏又報峰頭海月生

郭璞墓

不信驚濤內元堂向此高千年誰瀝酒片石未鐫銘數  
莫逃兵解奇難入葬經山僧遙指點相近是中泠

分賦淮陰古蹟送梅泚得趙嘏宅

淮陰古名郡騷客剩林扉杜牧詩評重枚臯舊宅依苔  
磯浸秋水蓮渚落紅衣倘有樓堪倚知君逸興飛

秋郊散步

涼風引閑步曳杖出城闈紆徐一二里後先三五人放  
眼野田畔照影澄潭濱意行無定所遠近安足論曩來

瓜豆區蕎花白如銀覽茲時物變彌覺斜陽親勞生近  
七十始作自由身肯效古秋士戚戚悲蕭晨

再寄南圻棲霞山中分韻得次字

前詩寄山中頗有渡江意荏苒已秋深我留君不至巖  
桂知再花江楓應半醉蘿月懸清輝松風蕩涼翠大都  
君眼中長貯我胸次雖愜煙霞心豈無友朋思計程百  
里遙言旋一帆易遲爾作重陽莫誤登高事

九月四日重舉詩集

故人僂指半消磨吟侶經時廢嘯歌拚把餘年閑度却  
其如結習未忘何重聯舊雨尊前少相顧新霜鬢畔多  
不向西風作高會黃花應笑客蹉跎

著老書堂集卷之六

丙子至  
丁丑夏

臨潼

張世進

軼青

正月二日訪竹町不值

殘冬一攜手經旬不相見旬日未云多匆匆歲華變何  
處繫吟蹤東風閉苔院

三日獨登露臺

竹裏登高石磴斜憑闌一望思無涯眼光莫道纔如豆  
容得春城十萬家

鞭春詞

東郊綵仗回城闈土牛龐然立府門詰朝太昊始司令  
打春故事宜遵循絲鞭五色各在手太守前導僚屬奔

繞牛三匝行且擊膈膈膊聲相聞須臾事竣官吏散  
伍伯奮袖椎作塵休將此舉等兒戲古制厥有深意存  
或言可散氣寒冽又云用勸民辛勤要之重農說近是  
故先黔首驅烏犍書生負郭無二頃硯田方寸時耕耘  
俶載南畝我何與平秩西成望亦殷人人願服十千耦  
家家看取三百困老夫但作鞭春曲長和康衢擊壤民  
上元夜雨中東半查

匆匆又上元默默思前度隔街詩老家連歲招我去促  
席倒深杯傳箋鬥長句如此幾春風倏爾先朝露素交  
荆難弟令節思良晤祇愁見面時轉作傷心助蕭條柴  
荆掩索寞槁梧據縱使明月明寧忘故人故濃雲况滿

天細雨紛如霧獨坐憐卯君含淒向誰訴

落燈夜飲榮木軒聯句

春雨霽暮煙凝

王藻

捲書幌坐吟朋

張世進

爰命酒仍

張燈

陳章撫上序飛光騰

余夢易獲良會逸興增

張四

科華燭跋層軒憑

藻竹戛玉梅翦冰

世進

善謔發雅令

徵章

曰既醉可以興

夢易

且小住待月升

四科

早春泛舟紅橋

重開勝境待宸遊步步風光可逗遛桃柳兩行遮野  
色樓臺十里夾溪流未看鴻鴈今年去但覺鶯花此地  
稠衰老逢春閑不得也乘新水泛扁舟

刀魚聯句

春江水煖碧差差陳章正是刀魚欲上時王藻貫柳寒

鉞懸一尺蔣德劃波雪色罨千絲陳皋年光催促來燈

市張世進風味清腴佐酒卮張四科記得焦公祠下泊

章桃花影裏喚漁師藻

### 送汪博士韓懷入都

論心纔幾日別我上長安舊學經生業新銜國子官柳  
從螢苑折花向鳳城看可憶清吟侶江邊老釣竿

### 春陰

鳩聲鵲語互紛紛獨坐虛堂總厭聞細草有心迎霽旭  
東風無力養癡雲遊人行止渾難定長日朝昏了不分  
未解春工何厚薄禁持梅柳護苔紋

### 祀社公迎神送神曲

坎坎兮擊鼓嗚嗚兮吹笛望粉榆兮神所宅豚蹄斯操  
兮盃酒斯瀝偕富媪兮來有赫莫我吐兮同舊水之不  
食右迎

社君之來齊明陳兮社君之去紙錢焚兮康我田功風  
雨勻兮求彼地財黍稷蕃兮虔禱既申分肉均兮秋社  
匪遙荅神勛兮右送

### 花朝後一日集抱山堂時韓懷將入都梅泝暫

### 歸吳江

閑堂作高會芳序倏已深虛窓入花氣疎簾蕩雲陰相  
對一杯酒各懷千里心匹馬風塵路扁舟煙水潯別離

亦常事顧我鬢雪侵何時仍此地共聽黃鳥音

園居春深

園居不知久芳序暗中移若以浮生較應非少壯時吟  
殘花次第開到日舒遲漸近春歸候清尊莫緩持

薄暮喜葑田研南同五姪見過

向晚身無事舉簾客正來相留看落日閑與上高臺倦  
鳥投林去殘花傍酒開未須催秉燭春月在簷隈

歸自真州途中口號

來時雙槳趁潮生歸去蒲帆六幅輕十日鑿江無一事  
梁閒看得燕巢成

客裏光陰換夾衣推篷愁見好春歸多情昨夜東風雨

吹濕楊花不許飛

題洪曲谿潛口舊居圖二首

紫霞山下舊爲家別後驚心歲月賒正對畫圖閑指點  
鄉鄰寄到故園茶

繁華看厭廣陵春千里鄉關入夢頻繡嶺峰前數椽在  
與君同是未歸人

貞女篇

爲新安汪氏女作

女未嫁而寡禮無必死方貞女曰否否不死無綱常當  
夫彌留際所憂在萱堂身後菽水責欲妾相承當期待  
殊不薄望我爲共姜孝義儻能遂性命敢自戕夫家乃  
弗許謂妾年正芳人事有乖迕妾意無徊徨不奉堂上



姑合從泉下郎豈忘父母養幸有兄弟行七日絕飲食  
萬火燎肝腸羣憐就鬼錄彼若登仙鄉吟成絕命詩從  
容復慨慷里門安綽楔有司肅烝嘗既顯二親教兼爲  
兩姓光世間失節婦形存心則亡究竟百年內先後歸  
北叩何如效貞女千載名猶香

初秋早起

推枕當軒坐秋天漸欲明涼風梧葉影殘月草蟲聲轉  
憶前宵熱逾憐平旦清人情真易變締綌頓嫌輕

七月十五夜金山寺觀放水燈

挂席登金山到寺日云暮數杵鳴昏鐘四圍生水霧少  
馬萬點紅燦向波心布是時值中元法筵集緇素口宣

貝葉文手藝蓮花炷委向急流中自信回潮去離如秋  
星疎合若浮萍聚前者逝已遙後者尾而赴迢迢指海  
門滅影向何處我聞釋氏慈幽暗期普度仗此列炬明  
脫彼諸苦趣認作聖燈非看成漁火誤轉似夜舒荷敷  
華避天曙梵唄寂無聲江水聞如故忽現白毫光明月  
在高樹

婦病

衰翁腹疾初平後萊婦俄爲二豎侵老去夫妻似朋友  
秋來隨唱是呻吟量投葠朮知無恙漸入桑榆恐不禁  
但得白頭身並健齋鹽對守亦甘心

秋日集讓圃送陳江皋之白下

開館重來八月中  
沈寥天氣一尊同  
流光又近黃花節  
小別還驚白髮翁  
鴨脚樹邊疎酒伴  
石頭城下繫吟篷  
此行若見西湖長  
爲問玻璃十頃風

時訪潁州阜陽令  
潘君秋田於金陵

病中遣懷

秋色佳如此  
閑門掩薜蘿  
死非年少免  
病是老人多  
凡藥無奇効  
吾心有太和  
窮愁欺不得  
二豎欲如何

後五君詠

劉侍郎艾堂

侍郎早登科  
洊歷華要職  
三朝股肱臣  
二紀林泉客  
生平慕鷹鷂  
擊物不暇擇  
投老歛鋒鋞  
游心唯翰墨

程編修泚江

泚江木天客  
而有山野姿  
二頃苦難得  
一事恥不知  
手復樊川跡

今竹西亭  
君所募建

意箋玉溪詩  
後生矜一第  
風雅嗣者

誰

馬主政嶰谷

白眉用世才  
利器未曾試  
扇物如春風  
吟詩有秋氣  
口中無雌黃  
胸次別涇渭  
身後一編存  
傳之賴難弟

全庶常謝山

于思貌昂藏  
小夫畏其口  
試誦金石文  
允推霹靂手  
合向名山藏  
詎宜玉堂有人  
既加擠排天  
復奪年壽

樓上舍于湘

于湘後來秀  
愛與黃髮遊  
馬卿無長物  
叔寶多清愁  
生

同蟲集蓼死異狐首邱

病革時欲歸  
葬吳門不果

遺詩非執友零落憑

誰收

竹町輯其遺  
詩方謀付刻

九日行菴

不到行菴久西風葉滿廊  
舊人餘幾輩此地又重陽  
易盡悲身事無聊託酒狂  
湏知開口笑非愛菊花黃

晚山

向夕平原立支筇細看山  
斷崖昏霧合高嶺夕陽閑  
衝虎樵夫下收茶野衲還  
幾家松火在未黑掩柴關

題洗象圖

文殊好獅普賢象智行何  
曾異鉢兩禪心離垢物亦  
宜閑爲伽那濯塵埃象師  
調象法有三減食次加鈎  
與杖

此術制醉兼制狂馴獸原  
無奔佚想蠻奴牽出形龐  
然修牙下垂鼻倒拳盆中  
滿貯功德水背上猶披錦  
繡鞵沙彌執帚意恭慎僧  
伽作禮腰彎跼不知蠢爾  
偶前滌何以諦視來諸天  
自昔神龍能饋供又聞馬  
有馱經用渡河異質亦通  
靈詎止和柔習羈鞅畫工  
水墨費經營觀者歡欣齊  
讚頌佛門廣大不皈依燧  
尾焚身殊可痛

踏葉

黃葉無人掃空林躡屐來  
稍嫌迷徑路似恐踐莓苔  
步滑晨霜覆聲乾野鹿猜  
勝他朝市客足底但塵埃

閏九月一日遊禪智寺

素節未云盡挈伴招提行  
僧稀粥魚冷院淨秋花明  
閑

烹古井水坐聽落葉聲孤亭懶重上爲有故人情

竹西亭復於泚

江

閏重陽郊遊同用高季迪九日登虎邱韻

從來天意妬重陽風雨常居十之九今年兩度總暄晴  
更擬相將就林阜出郭初驚木葉疎支筇不怕苔紋厚  
紛紛遊侶各爲儔惟有吟朋稱耐久却看賓主半英奇  
多謝招攜到衰朽舊人追數素心稀浮生輸與黃花壽  
所欣腰脚未彎跽尚可追陪共趨走爲問緇塵染素衣  
何如白髮親紅友茲晨放意向郊原當時自悔營升斗  
亭亭霽日照林端冉冉秋雲飛隴首溪邊吐艷木芙蓉  
隄畔搖風水楊柳猶似涼空蕭瑟初未經冬序凋傷後

偶尋園囿散幽襟閒發詼嘲開笑口優游絕似鷺忘機  
局促肯同魚麗留不辭痛飲效渴羌但恐摘詞慙幼婦  
題糕落帽語陳陳相戒毫端空所有興酣促席更論心  
暮色催人還握手自今欲作文酒娛可能遺我支離叟  
荒齋咫尺倘相過先爲諸君掃埃垢

分詠蟹事得蟹籩

巨蟹正爬沙值此闌溪竹宛如羊觸藩難效猱升木不  
知退步寬空有橫行足微物信無知機心亦良酷

說鬼

窗前夜雨秋騷屑促坐荒齋無可說偶然一客話幽冥  
不覺瀾翻語更迭耳聞目見雖異辭俱有陰風出脣舌

猗猗直令寒毛生淒切如聆哭聲咽座隅童僕互偎依  
席上燈光半明滅掀髯抵掌那肯休已報譙樓三鼓絕  
阮生著論見誠偏坡老妄聽疑未徹須知世事更荒唐  
說人說鬼何分別

讓圃八詠

松月軒

結茆僧已去閑客此棲遲不識松閒月清光今爲誰

簡公塔

生與衍師遊不受榮公號一塔黃葉中西風爲閑掃

雲木相參樓

樹靜雲影動時時互參差入林鳥不覺倚闌人自知

黃楊館

空館種黃楊寂寞誰相顧不長亦不凋我願如此樹

蘿徑

一徑曲逶迤垂蘿幕其上護得碧苔深幽尋賴藤杖

遺泉

地僻無人汲一泓深草中品外自清冽不煩桑苧翁

碧梧修竹之間

陰陰夏日遮颯颯秋聲弄下有遺世人狂歌憶鳴鳳

梅坪

種梅自成列未許凡卉參年年玩香雪不枉住江南

冬晴

融融霽色滿簾櫳不似常年十月中徑草向陽猶弄色  
窻蠅得煖忽騰空天心似念飢寒客麥壠還資雨雪功  
細較物情難盡厭忘情只有負暄翁

重過曾襄愍公墓

此地理寃骨於今二百年高墳幸無恙宰木忽蕭然身  
欲恢河套魂難庇墓田石麟人不買留取臥荒煙

蓑

隴畔春霖著去江邊暮雪披歸不羨高人荷製焉知貴  
客朝衣

笠

任爾乘車不下何如戴笠閑遊漁父桃花水上詩人飯

顥山頭

題板橋夜月圖

十四樓前月色明長橋深夜麗人行笙歌斷後煙波在  
剩有官蛙鼓吹聲

雪後僧房

雪霽叩蘭若皓然深院清蹲樹鳥不下擁階僧未行寒  
光耀佛面勁氣沉經聲茶煙竹閒出夕照窻上明甫聽  
瓦溝滴復見簷冰成眼前具生滅默坐銷塵情

登小臺望江南山

生無住山緣而有看山癖閑上小臺端獨倚危闌側殷  
勤潤州山嬈娟送遙碧到眼雖分明其下大江隔欲往

老方書堂集 卷六  
路迢迢相視情脈脈平生善躋攀老去衰筋力未忍負  
幽岑猶思理輕策自笑萬慮空望岫心不息

對酒

半是疎狂半是迂此生只合老菰蘆難醫貧賤書千卷  
暫作神仙酒一壺天上從教烏兔轉人間任作馬牛呼  
惟將終日瞢騰眼閑看劉伶荷鍤圖

歲晚二首

記得薦椒盤匆匆臘又殘新春旬日到舊歷幾人看積  
雪中庭淨清霜滿鬢寒不將書送老何事更爲歡  
回憶今年事昏昏半已忘卷中詩百首燈下酒千觴髮  
豈緣梳短孫將及我長頽然稱漫叟真覺負流光

冒雪行西山道中

急雪空山道同雲遠近昏飢烏鵲宿麥寒犬護荒村農  
務經冬息田家閉戶尊北風泥淖裏行客正消魂

公子家

金張累葉珥貂蟬天與繁華樂少年門廕有階嫌就職  
賜書盈架懶開編座中狎客承顏色夜半妖姬奏管絃  
多少窮途舊親故看他平地作神仙

雪後重過小玲瓏山館

南鄰一老已衰頽偶過園扉值晝開重到却將前度憶  
二年不向此中來凌寒竹瘦清陰在覓句廊閑落葉堆  
寂寞斜陽殘雪裏幾番欲去又低徊

以清時有味是無能爲起句同梅泚竹町作  
清時有味是無能落拓人將漫士稱禪悅閑來參白足  
書淫老去戀青燈但知木鴈希蒙叟敢謂蓴鱸效季鷹  
化日舒長身健在逢花開處興堪乘

雪後登郊園小樓

雪意初闌後危樓拾級看平田欣灑遍高樹惜吹殘寂  
寂人踪絕荒荒夕照寒晚來晴不穩雲影又迷漫

九言題沈石田秋林月屋圖

幽人老屋之外萬木圍秋來木葉脫盡懸清輝比鄰野  
叟夜涼眠不得宵分還拄竹杖來敲扉疎星三點五點  
耿斜漢棲鳥一聲兩聲啼高枝呼童汲泉煮茗醒殘醉

相與攜手信步尋新詩何夜無月何處無竹柏自昔東  
坡有言閑人稀亟須寫入畫圖記此夕清景一失異時  
安可追

惜歡

但可爲歡酒便斟因循不似少年心望前明月邀賓賞  
春半芳園趁蝶尋漫道塵勞難盡遣也防風雨易相侵  
眼前樂境知珍重即是閑人惜寸陰

三言題王石谷水村圖

水之濱山之麓樹陰陰橋曲曲三家村數椽屋槿籬邊  
植修竹柴門外飛屬玉此中人應不俗

和秋涇月夜渡江



詩人千里來向夕至江口一葉度空明春潮初落後天  
心顧兔圓波面金蛇走棹歌風徐引帆影水不受愛茲  
清景佳未覺長吟久金焦兩點煙遙遙一回首

風車聯句

嘗讀耒耜經張世進農具皆有法水車製已良王藻茲

乃更便捷八風供使令陳章萬漕隨歎欲不藉黃犢牽

陳皋無煩赤脚踏其下圓輪揉張四科其上直木插交

繫繩纚纚蔣德分張帆葉葉軸幹聲呀呀萬涵機觸齒

業業蜿蜒龍骨修世進翩翩鴉翅接厥工舟輿兼藻爲

用巽坎合健行左右旋章順動萬千匝形既相烏肖皋

意仍轉蓬協碌碌不恐泥四科泛泛非利涉田頭響刁

調德塍畔走鏗鞳桔槔勞俯仰涵轆轤困疲繭遙睇誤

連檣世進側聽疑放閘袖手夏畦閑藻瞥眼秋稼納爰

知備物妙章始識因地愜作甘資灌輸皋恒暘賴調燮

噫氣任自然四科導流常不乏溝車慶滿盈德梁栢挂

妥帖蜡祭從此修涵飛廉貺宜荅世進

題萬少滄松寥玩月圖

秋山悄無人入夜鐘梵歌坐看蒼茫中清江浣明月

送少滄之廬陵

陽春二月時君作千里遊莫貪東風便少爲南枝留花  
下互賡詠香中相勸酬後日一分手此樂可再否夙聞  
廬陵郡厥土沃且幽惟有西江派賴君障橫流躡屐青

原山放船白鷺洲是時倘著白寄我銷離憂

紅橋楊柳枝詞三首

能白能紅桃李枝妖嬈只解鬥春姿憑誰畫出東風態  
只有橋邊萬縷絲

清陰不似舊紅橋粧點長隄十里遙露得東皇新雨露  
行人爭惜短長條

紅橋濃綠接高橋盡繫青驄轡畫橈寂寞西城人不到  
古牆陰畔影蕭蕭

春深二首

容易盼春來東風底事催等閑寒食過次第牡丹開已  
有匆匆意休斟淺淺杯請看芳樹裏遲日又西頽

一日復一日春光疾似梭爲期纔九十強半已銷磨新  
綠添多少繁紅剩幾何少年渾不覺老去歎蹉跎

竹町以詩招賞藤花余以事未赴承示同人即  
席和篇因次原韻却寄

殷勤折柬邀賓意爲恐朱藤易放殘身外萬綠拋未盡  
花前一醉覓應難情知小院春光好坐對空堂暮雨寒  
多謝故人憐寂寞新詩幾首寄來看

憶環溪藤花

環溪溪上紫藤新一片風光記最真引蔓曲緣臨水樹  
垂花低拂過橋人每逢夏淺春深候不厭徵詩鬥酒頻  
二十年來遊賞地如今欲到竟無因

恬齋出家釀色香味皆佳余名之曰廣陵春  
君家新釀清而冽合配揚州第五泉敢謂聲名由我立  
未知方法向誰傳取材不過需三一論斗真堪值十千  
可惜主人非大戶閑看座客引觥船

曲溪病起招飲

主人真愛客小愈即招邀策杖行猶緩吟詩興未銷食  
眠須慎重朋舊已蕭條稍健期相過柴扉路不遙

山僧送筍

竹中吾久別晚笋又如斯分我山林味遠煩雲水師  
斷從朝露下到及午炊時上番留多少編籬好護持

偶於扇頭見余茁村贈五姪二詩感而有作

攻詩苦勝茶說士甘於肉平生一片心歷歷常在目吟  
魂物外遊遺草扇間讀古色陳鼎彝清音扣冰玉即此  
寥寥章傳世無不足吁嗟百年期易盡如風燭存者菁  
華銷歿者墳草宿殷勤語阿咸此事當相屬

露筋祠

荒祠陳象設苦節古來稀萬喙一身集孤魂九地歸依  
然紅粉貌空有碧紗幃愁對虛簷外年年白鳥飛

午枕

小院深沉晝景遲北窓風簟展琉璃老逢長夏渾無事  
睡與閑人似有期熱客不來蒼蘚徑新蟬初噪綠槐枝  
曹騰記得關山路紅日當頭策馬時

金盤曲

事見楊光  
先筆記

相國捐軀明社屋弟有寡妻顏似玉將軍挾勢欲爲婚  
忠義家風寧受辱潛攜利刃入中閨不惜殘形自荼毒  
君愛妾貌春花妍豈知妾志秋霜肅金盤擎來血漉漉  
請君細看橫波目

漁

世外幽閑境低蓬任所之谿山終日對煙水一家隨踪  
跡依鷗鳥生涯寄釣絲菰蘆有真樂未許市朝知

樵

炊煙生萬井樵客獨辛勤腰斧入青靄荷薪辭白雲山  
林非有託麋鹿是同羣換得城中酒歸來日又曛

耕

春至土膏動田家敢自休乘時思播穀占雨聽鳴鳩曉  
隴扶犁去煙村帶月投耕夫人不恤何暇恤耕牛

牧

烏犢耕初暇閑驅綠野中前陂多水草同伴有兒童倒  
載過荒隴橫吹弄晚風怪他騎馬客鞭影太怱怱

雨中紅橋觀荷

城北多芙蕖冒雨放孤艇陂塘數里遙花葉相與永遂  
令清淺波不受樓臺影空亭偶延佇熱惱一時屏雲陰  
檻外移鷗夢香中冷坐久澹忘歸斜陽明樹頂

題王蘭泉舍人三泖漁莊圖

三泖支分太湖尾極目茫茫盡煙水香茅結屋碧蘆閒  
閑來自把綸竿理綸竿終老亦何妨劍氣珠光難久藏  
簪花已醉杏園宴獻賦新除薇省郎馬蹄催上長安路  
舊寫漁莊自攜去須知身與掖垣親依然意愜滄洲趣  
籬門四面絕風塵釣叟眾師好結鄰披圖我亦多遐思  
何況當時畫裏人

吳園池上值雨

水榭披襟坐微聞隔浦雷濃雲纔滃合凍雨忽飛來點  
急浮萍亂聲喧浴鷺猜西風驅太疾又過蜀岡隈

文信國祠

宋末生丞相儒風一代收文章等龜鑑科第屬龍頭通

籍長居外陳書弗用謀穆陵真闇劣秋壑但優游戎馬  
踰天塹王師首贛州亦知難挫敵聊欲勸同仇孺子軍  
前虜孱王海上舟江南寸土盡冀北隻身留八日曾枵  
腹三年不下樓生平寧肯棄死外復何求豈博忠臣譽  
無貽故國羞聖賢書克踐俎豆志終酬此是經行地爰  
將祀事修荒祠雖寂寞正氣自千秋

義鶴行

老鶴一雌復一雄春來育子高巢中村童潛以他卵易  
雛成乃弗肖厥躬雄疑其雌匹異類逐婦聲與鳴鳩同  
雌不能言但求死喙鑽樹隙身懸空頃臾性命成鬼物  
其雄悔悟思相從思相從不相見自此好逑非所願同

類何由識苦心引來寡鶴教爲伴可憐冤魄再生難忍  
使恩情中道變翩然矯翮去深林回首舊巢都不戀朝  
孤飛暮獨棲樹頭夜夜鳴聲悲精誠可使白日鑒酸辛  
詎欲黃泉知雌以死報雄雄以鰥荅雌存亡兩念俱不  
欺人間夫婦如此稀嗚呼人間夫婦如此稀

賦得清風來故人

爽籟真吾友翛然座上生最憐重到日不改舊時清屈  
指三秋別披襟一笑迎何如襍穢子觸熱叩柴荆

夏日建隆寺齋會

素非佞佛老欲依僧詣彼初地偕我良朋方袍出迎氣  
專容寂松竹分涼茶瓜餉客高窓晨掩虛堂晝陰市聲

不到疎鐘送音坐久無言乃至無想狂象既調睡蛇焉  
往林端月上殿角烏棲相期秋序來聞木犀

秋涇南歸寄懷王主政穀原

明日鴛湖去煩君問故人身應勤定省跡似倦風塵酒  
戶當如舊詩篇定更新深秋能共載遲爾渡西津

詠抱山堂前白鷺

主人耽野趣庭院養春鋤拳足依花下梳翎趁雨餘不  
如生處樂豈曰食無魚舊侶知何在煙波想自如

方環山畫讓圃老樹圖

植樹之地不可到寫樹之人今已亡丹青一幅徒挂壁  
回思人境俱茫茫蒼皮黛色應如故耐久安能如此樹

只恐空齋風雨時妙畫通靈亦飛去

江樓聞笛

江上愁心已黯然更堪長笛起遙天移情似鼓湘靈瑟  
墮淚遙憐估客船欸乃數聲哀響裏闌干一角夕陽邊  
漁翁真是忘機者棹蘆汀正醉眠

著老書堂集卷之六

著老書堂集卷之七

丁丑秋至  
巳卯夏

臨潼 張世進 軼青

村童籠秋蟲售於市買置簷閒聲頗清越枕上  
成一絕句

筠籠貯得草蟲鳴簷際嚶嚶徹五更已是涼宵無睡客  
又嫌多事買秋聲

送梅泚之京師二十韻

白頭王上舍旅食又京華以我無成就因君重歎嗟讀  
書真謬誤爲士莫矜誇無力營三窟徒勞誦五車不邀  
人賞識先被鬼揄揶似爾千言富何曾一命加北窓眠  
未穩西日手還遮但索長安米非看上苑花騎驢憐賈

東坡先生集卷之七  
島寄婦羨秦嘉衮衮兒曹貴揚揚意氣奢幸爲軒上鶴  
忘是井中蛙杯炙知難戀林泉路不遐貧纔賣文字用  
莫等泥沙黃葉初辭樹扁舟遠別家離筵猶水次明發  
即天涯爨下收焦尾塵中辨鑊錮高才終遇合暮景奈  
傾斜只有謀歸好其餘作計差竹弓同射鴨草屨共撈  
蝦此願他時遂相逢酒便賒

秋日登大觀樓

百尺危樓壓女牆憑高一望思茫茫江從西蜀朝滄海  
山自南徐接建康鴻鴈行邊天著水蒹葭老後露爲霜  
欄前多少興亡事又見遙空下夕陽

黃園池上

入門心眼豁秋水照入寒地迥孤筇引廊回四面看畫  
憐波色淨夜想月明寬我欲浮輕舫時來把釣竿

輓洪曲谿二首

君身匪貧賤終歲少優游苦學如高鳳沉疴類伯牛丹  
鉛盈几上藥裹置牀頭生趣何如死而今已覺否  
屈指吟朋喪君爲十一人龍鍾多少淚揮灑不堪頻爾  
我交尤早過從老益親自今扶杖出忍復詣南鄰

將於江村卜居同人聞而賦詩余亦繼作

人生樂事多造物咸我靳唯茲十畝閒愚叟豈無分聞  
有幽居偏恰與清江近疎籬榆柳遮小池潮汐進時將  
魚鳥親永絕車馬恩此地卜終焉窮老吾不恨所惜乏



吟朋共語祇田畯但當時好花更擬蓄良醞春秋風日  
佳諸君倘相訊離城一舍遙好向煙波問

席上再送梅泚

欲去未成去又爲今夕歡轉因文醞數愈覺別離難候  
鴈南來近征衫北向寒來宵明月色何處倚舷看

卜居江村不果讀諸同學相勸之詩感而有作

二首

擬把柴扉面水開同心相勸隱蒿萊而今見說田家樂  
似作遊仙好夢回

識字農夫豈易爲勞生依舊落塵羈秋來枉決扶犁計  
剛賺諸君作好詩

蚤起六首

秋夜日以長老人起逾早何事最關心牽牛花正好  
朝朝盥漱餘窻上始晴旭僮僕暗相嘲先生無睡福  
起來無一事端坐理殘編憶抱書包日匆匆六十年  
讀書夫何爲鑿古聊自適大聖吾敢希庶幾不爲蹠  
霜氣侵被池展轉失餘煖自是曉寒催非屬雞聲管  
向夕即高枕天明起獨先長宵歌舞客那得不朝眠

坐秋雨菴竹亭

萬竹遶精廬時來坐清晝疎林今再過孤亭值新構搖  
陰傍簷楹分綠上衫袖但覺涼風生不患斜陽漏炎序  
亦蕭森況是深秋候

九日登上方寺

誰家九日能枯坐多載笙歌北郭游老去開心惟愛靜  
人間蕭寺最宜秋門臨曠野晚禾淨風過長廊落葉留  
遙羨悠悠江水外青山終古不知愁

榮木軒看菊

空齋何所有落葉聲鏗鏘忽於石坡陀高下羅秋英盈  
階五色爛入戶雙眼明容華奪春艷骨韻含霜清於茲  
把一卷塵慮何由櫻余情亦蕭淡時復遶叢行

秋苔

蒼苔原索寞何況到秋深無力緣階上時煩撥葉尋不  
辭卑地託猶被曉霜侵明月多情甚長來照晚陰

野柏

豈是不材木甘依寂寞鄉本無桃李艷幸免斧斤戕種  
植何年代經更幾雪霜蓬蒿紛滿眼獨立自蒼蒼

輓汪恬齋

本是葭莩戚而爲文字交有花頻醺會無事互推敲學  
殖晚逾進塵勞近已拋回頭思曩昔如夢復如泡

較量朋好內所遇獨君亨年老身無病家饒子有成硯  
常餘墨瀋案不去楸枰一旦辭塵濁飄然撒手行

連歲傷知舊幾無淚可揮欲交英俊輩其奈性情非爽  
節曾同醉清詩獨入微黃花猶未落又歎故人稀

九日詩  
集君有

白鴈往來雙鬢改黃花開  
落故人稀之句翌日逝矣

晴窓

冬窓長不啟最喜上朝暎觸紙蠅無力搖風竹有痕密  
留香篆久近炙硯池温如此讀書地老來宜杜門

題侶松上人壁

入院僧離迓云師昨渡江西風吟竹徑斜日冷松窓妙  
義遙難問塵心淡已降繩牀閑坐久不覺晚鐘撞

對菊

舊雨尊前少新霜鬢畔加年年澹相對無恙是黃花

和五姪拳毛騮歌

馬中殊相拳毛騮當年曾育吾宗家主人芻秣不異阜  
意與凡馬無爭差偶然騎出潼關道五百里程猶電掃

朝馳夕返始稱奇不數驂騮與騶裒佳名雖被閭閻傳

雄姿空向塵埃老我聞秦王平漢東

劉黑闥自稱漢東王

所乘正與

此馬同箭瘢竟體如刻畫終與真主成大功昭陵刻石

列墓道曹霸奉勅圖屏風一歸天廐一在野所遇何乃

殊窮通阿咸少時返鄉里棧中親見真龍子閑來追想

作歌行累歎重欷聲滿紙此馬不遇汝勿悲馬主於馬

終相知汝今伏案如伏櫪家有名士知者誰眼前寂寞

無人顧更把孫陽望行路

孤泛

涉冬無所爲出郭泛孤艇平時歌酒場此際蕭寒境高  
柳染霜痕清溪沉日影身世老魚潛詩情白鷗迴沿緣

澹忘歸前路水煙暝

和秋涇榮木軒月夜

孤客時緘酒寒宵淪茗嘗詩情縈故國月色伴他鄉影  
過飛鴻疾光移刻漏長披吟思此夕我亦在西廊

慰程魚門覆舟

向夕川程任纜牽誰知中道值危顛未隨太白騎鯨去  
偶似知章落井眠行路艱難今始驗平生忠信應彌堅  
布帆從此長無恙但莫輕乘雪夜船

懷梅泚

駸駸短日疾於梭別後俄驚一月過故國黃花開欲盡  
長安落葉想無多閑瞻紫禁心猶壯試攬青銅鬢已皤

與爾生年同癸酉久拚江上老漁蓑

寒野

空郊人跡少霜後更蕭然宿麥未穿土飢鳥常在田荒  
原農閉戶古道客籠鞭詩意如郊島長吟夕照邊

過鐵佛寺看黃葉

意行無近步荒寺試重過老葉樹頭變清霜野外多僧  
稀停梵唄日暮冷煙蘿搖落尋常事其如白髮何

寒夜獨酌

老夫貪早睡奈此冬夜長未敢就衾枕聊復傾壺觴始  
酌肢體和徐引心神康殘燭短見跋孤影暖在牆寂寥  
自酬對澹泊無參商所嗟酒戶退數盞已頽唐丁丁寒

漏轉嗷嗷征鴈翔起行自開戶庭下月如霜

即事贈孟亭太守

先生弱冠戰文場知遇恩深老不忘三尺傷心罹國憲  
一杯揮淚葬他鄉當年偶植郝家桂今日猶存陸氏莊  
白髮門生牽紼處直教行路亦沾裳

塵

靈犀難辟扇難揮空際常隨野馬飛聞說軟紅高十丈  
不曾吹上綠蓑衣

廢寺

廢寺無人入披榛覓路蹊碑亡跡僅在佛古面全薰香  
積鼠應去浮圖鴿尚棲興衰皆幻境不用重悽悽

廢池

尚有石陂陀沙崩草漸多憑闌難照影經雨略生波失  
勢憐蛙黽爭榮憶芰荷池平已如此何必雍門歌

冬日山居

結屋寒山裏蕭然絕世緣虎踪門徑雪松氣地爐煙曝  
背依巖石敲冰汲澗泉不愁無歷日梅放即新年

題仇實父程門立雪圖

先生瞑目儼坐忘誰其侍者游與楊飛雲墮地深一尺  
兩賢侍立如堵牆寫生賴此丹青筆貌出神閑氣專壹  
祇緣執禮正虔恭自覺虛堂失寒慄我聞純公無厲容  
先生峻削如孤峰譬之天道四時備嚴肅不可無秋冬

座上春風門外雪須知時雨化俱同

題袁安臥雪圖

雪中僵臥喚弗應舉室不聞啼號聲長官啟戶問其故  
始知節重飢寒輕披圖懍然起深敬如此孝廉名始稱  
於今豈但少袁公無此妻孥無此令

雪意

欲雪未成雪豐年似可期蒼茫暮雲合消息凍禽知漁  
艇收綸處田家引領時老夫無一事炙硯待題詩

敝裘

敝裘何足戀伴我已多年被體非因煖關情不忍捐尚  
堪衝雪去還藉覆衾眠莫歎蒙戎甚無衣更可憐

寒日真州道中

不待而今始倦遊又衝寒色下真州船邊響急流漸過  
岸曲陰多積雪留客子貪程隨去鴈田家曝背對閑牛  
眼前勞逸誰優劣自歎辛勤老未休

書朴樹灣酒家壁

扁舟如葉指江湄短日惟愁到岸遲數盞旗亭風雪酒  
匆匆不是淺斟時

歲暮

一年看又盡千載去如斯大藥何人得深杯且自持庭  
梅紅欲綻徑草碧先滋生意眼前滿吾寧獨皺眉

正月六日集榮木軒

新年文字飲首在阿宜家同調幾人在相看一歲加煖  
風回草色殘雪戀梅花從此青郊外尋春興正賒

題董文敏畫文姬製拍圖

風鬟霧髻中郎女十年歷盡穹廬苦本是香閨窈窕姿  
竟為異域腥羶侶言語兇離不可通援琴自把笳聲譜  
華亭宗伯掃雲煙忽調丹粉寫嬋娟丰神不在描來似  
悲憤能教筆底傳閑窓展玩增歎息狐襟貉袖思當年  
嗟哉文姬真命薄飛絮浮萍任飄泊南鄉終隨塞上鴻  
還家已似遼東鶴披圖却憶漢宮人一曲琵琶老沙漠

正月十二日始晴

春空日日濕雲遮躡屐誰過野老家清曉山童忽相報

一庭晴旭曬梅花

試燈日同人集著老書堂東玉井

寂寞書堂裏春燈也自紅座中詩下酒簾外雪隨風煖  
斲青陽候寒欺白髮翁地爐同擁處猶恨少車公

齋心

吾心本湛然肯為外物擾閑齋瞑目坐內視殊了了靜  
如止水澄洞若明鏡皎此時方寸中萬感未萌兆要湏  
養虛靈匪欲慕枯槁佛老與吾儒相去祇微眇

題梅花道人夏山欲雨圖

寫雨不如寫雨勢仲圭於此擅能事萬木陰森氣盡昏  
四山懵懂容如醉古寺長廊僧不來投林息羽禽先避

山中巨壑藏蛟龍飛騰應入元雲內只須空際起風雷  
立見巖端降霧霈我曾觸熱作山行舉頭忽見紅輪翳  
前村尚隔數里遙疲馬安能俄頃至雖然點滴未沾衣  
其奈心神自生悸此時不及畫中人安坐茅堂門早閉  
閑齋展卷再三看緬想勞生發長喟

棉花歌爲宮保方宜田先生賦

古貝由來生異域何人攜子來中國播種常於二月時  
敷華每向三秋陌高原霜後白皚皚婦子田間齊掇拾  
攬車先用轉搖功抨弦次盡敲彈力紡之爲布擘爲統  
厥用真堪同稼穡復聞嶺海多木棉歲吐高花半天赤

劉克莊木棉詩幾  
樹半天紅似染

稱名莫道偶然同奇溫在昔能相敵天心

愛物一何仁不待蠶繅自生植尚書座側寫卑枝意與  
農夫共休戚杜陵廣廈願千閒白傅大裘思萬尺古來  
禦寒俱絲絮近代專歸富豪客遠購南方八繭綿競收  
扯地千狐腋可憐天下服棉人半屬齊民與逢掖更有  
鶉衣百結身欲求銖兩嗟難得此圖冷淡不中看此花  
寥落知誰惜畫師欲取世人憐但向屏風寫春色

重見泮江老友之孫感而有作

故人長逝已三年今日雛孫及我肩乍見長成殊快絕  
却思孤露轉淒然一樓書卷留先業兩世科名屬後賢  
曾是當時琴酒客摩挲老眼望騰騫

送周牧山遊蜀



東南圖遍佳山水不到峨眉未是奇轉地灘聲閑倚柁  
入天峰勢獨支頤船中但載琴尊去筆底全將造化師  
知爾歸來詩亦進灑西親拜少陵祠

薄暮蜀岡看梅

空山無遊人梅花更幽靜維舟傍水涯杖策緣石磴日  
落千樹明風恬衆香凝江外失遙峰林端出疎磬暝色  
難久留行歌互相應回首白紛紛知有新月映

半查招集山館

詩人身乍健招客坐花前老輩而今少春光此地偏與  
君同一醉計日已三年不厭過從數須教禮數捐

二月望日庭梅已殘秋涇研南五姪見過小飲

竹外門常掩香中客到遲寒花將盡處春月正圓時一  
徑留疎影前宵記滿枝猶堪助清賞杯酒不須辭

采桑詞

紫山看火鳴聲急佳人侵曉行南陌也愁清露濕羅裙  
箔上蠶飢遲不得高枝葉茂卑枝稀還倩春風扶上梯  
大姑手摘小姑拾懿筐漸滿相提攜此時但覺柔桑貴  
穠李天桃都不愛鄰翁擔花何處賣賣與城中女兒戴

春日過東園

芳墅在城南東風引遊興到門略彳橫一水明於鏡灑  
迤入茅堂蜿蜒循石徑庭梅落已殘溪柳搖難定地迥  
行人稀江深啼鳥靜平生厭囂塵幽處愜吾性富貴甘

讓入林泉亦由命何時二頃田與此相鄰並

過亡女團兒墓

桃花開幕後菜花開幕前昔愛春日好今向春郊眠何人不黃壤所痛凋芳年祇緣聰慧過那得壽命延彭殤雖一致恩義豈遽捐停車獨揮涕欲去還留連

抱山堂櫻桃花下書竹町玉井秋涇松滋歷年

吟卷後

年年樹底共銜杯曾讀吟箋惜未來今日櫻桃花似雪白頭人到一徘徊

春日莎圃

記得秋林黃落重來芳草青饒風花千點萬點煙柳長

條短條不趁身閑取醉須知春去無聊此閒頗受明月何用銀燈夜燒

千里鏡

卷紙爲筒如束筍節節相銜隨手引玻璃層疊吸空光遠視曾無毫髮隱市兒持索高價沽云出西洋製作殊人生眼不見眉睫欲窮千里胡爲乎我聞明王不下堂目營四海能周詳又聞名將決勝算帷幄中間可遙斷世情但欲尚奇淫誰知玩物盲其心此心清似冰壺瑩千里在人不在鏡

篠園圖爲程令延賦

園爲令叔涇江太史別墅今改三賢祠

柳下柴扉面水開翰林官罷此徘徊春前載酒探梅去

雨後攜鋤斲筍來留與名賢安俎豆猶煩小阮寫池臺  
他年誰向遊人道舊是先生闢草萊

賣琴詩爲余研南作

舊琴何忍賣屢空欲留難護惜連囊去淒涼剩譜看清  
音猶可想古調更誰彈辜負山窓外松風夜月寒

雨後湖上

放棹乘初漲風光一雨新飛花晴有態芳草淨無塵興  
發猶耽酒年衰倍惜春韶華幾分在行樂敢因循

雨中飲馬力畚石蓮書屋

折柬相邀躡屐尋故人門巷似山林簿書拋後親緇帙  
庭院春來富綠陰君有文章千古事我餘花月少年心

當時同學今誰在容易尊前酒共斟

過竹町勤有書屋看藤花

瀟灑詩人宅朱藤又作花吹香籠小院分艷過鄰家客  
興乘閑至蜂聲向午譁殷勤頻醉我相對惜年華

三月望夜與六七兩弟飲紅橋隄上

畫船燈火歸放出湖上月散彩浮澄波分陰繪疎樾傾  
耳萬籟希舉頭一輪潔來宵何處看圓魄應稍缺有缺  
還有盈年華去飄忽不見清光中弟兄皆白髮

秋雨菴筍園

春雷初過雨初晴菴後菴前筍盡生村犬放教中夜守  
山僧留待上番成掀泥已有干霄勢墮地時聞解籜聲

他日入林攜枕簟翠陰深處一襟清

綠野

極目郊原外青青入隴雲晴芳千頃合遠色一溪分村  
落在何處牛羊散幾羣清時春雨後無地不耕耘

題吳梅查疏泉圖

泉脉有時堙導之復奔注豈惟順物情兼可暢天趣石  
上玩流紋雲中想來處幽人無競心任出空山去

江園口占

江家別墅多紅藥占斷揚州四月時清曉園丁曾細數  
花開一萬一千枝

聞梅泚將南歸

臨風日日盼君歸消息遙傳色已飛豈爲別來時序久  
自緣老去故人稀千金駿骨誰知重七尺漁竿計未非  
莫畏長途漸炎熱江南猶未脫春衣

山館席上送陸南圻郎中入都二首

君才不當隱再出固其宜此去爲郎日全勝佐郡時含  
香趨粉署珥筆走丹墀應有馮唐羨顛毛尚未絲  
以我當遲暮送君辭故鄉既期勲業富又恐別離長後  
會更何日相思各一方小山叢桂畔把酒意茫茫

送大恒上人歸南屏

十載不相見我成衰老顏清秋一握手杖錫遽言還亦  
知猿鶴性肯戀城市閒所慮後會杳復如前期艱碧瀾

西子湖黃葉南屏山曩昔同遊處讓師閑掩關

登三賢祠高詠樓

享祀名賢地最幽新刪修竹起高樓岡形西去連三蜀  
山色南來自五洲可惜典型徒想像若經觴詠更風流  
人閒轉眼成陳迹聊倚欄干散暮愁

將往南莊東半查

夫君真靜者清冬適田園收穫偶乘時幽偏聊避喧想  
當讀書暇但與農父言欲偕塵外侶閑訪江上村朝同  
負晴旭暮共傾瓦盆相聞知不厭倘爲候柴門

冬旱

米價深秋賤陰膏兩月枯農寧耽懶惰地已任荒蕪來

歲將無麥非時不大雪可憐頻歉後民氣未全蘇

聽落葉

寒齋羣籟寂落葉響琤琤想像隨風態分明墮地聲閑  
居知改候端坐念浮生試攬青銅照霜絲脫幾莖

霜橋

野橋霜覆遍欲過每踟躕未有人踪踐猶疑月影鋪滑  
容空騎度怯仗短筇扶回憶經行處吾今倦道途

食菜歌

朝饗夕飧一日過老圃老農笑吾情清晨買得踏地菘  
爛煮稍將鹽豉和歡然一飽無所營捫腹徐行復安坐  
自思寓形天壤閒何啻泰山有埤堦彎弓力無五石強

讀書功未萬卷破區區空解咬菜根誰云百事皆可作  
去多少男兒出窮餓富貴幾時還軾軻藜羹藿食并難  
求暫享千鍾那足賀不能鼎養免鼎烹始知食菜爲功  
大

寒夜獨坐

寒宵誰伴影蕭然月在中庭鴈在天只恐五更常早醒  
何妨乙夜且遲眠酒徒纔剩兩三輩歌板閑拋二十年  
況是近來雙眼暗不容燈下理殘編

寒燈

誰伴寒宵坐孤燈一焰紅光分松徑雪影颺布簾風凍  
蟻聊相對飛蛾不用籠短檠宜我輩難入畫堂中

寒齋遲客

清冬茅屋下昨與素心期寂寂閑扉掩駸駸短日移應  
無塵事阻何故足音遲兀坐寒威重清尊嬾獨持

南郊秋雨菴客問命名之義以詩荅之

茆菴底事名秋雨爲有修篁遶屋生試聽西風搖萬葉  
蕭蕭颯颯是何聲

鴈

不受人閒矰繳加相呼相逐到天涯江南塞北迢迢路  
水宿雲飛處處家冷性豈能隨燕子閑蹤只合在蘆花  
秋來正有分行痛怕見長空一字斜

舍弟熙亡  
於季秋

自笑

自笑狂奴態新來更不狂聞雞睡中夜捫蝨坐斜陽欲  
以愚名谷惟將醉作鄉心情終崛強難入少年場

題司馬溫公獨樂園圖

溫公屏跡居洛陽小園築向尊賢坊當時天下苦新法  
公於百姓寧相忘園名獨樂良有以進則禹稷退顏子  
青山流水恣優游僅得熙寧十五秋正棲林壑樂其樂  
復登朝宁憂人憂洛陽名園鬱相望此地樓臺難與抗  
八百年來樣本留平泉草木知何狀

春日過秋雨菴

精廬南郭外杖策復經行鳥語有禪意梅花無世情棋  
消春晝永酒泛夕陽明我是忘機客山僧莫送迎

送秋涇之關中

身老不歸秦驪歌轉送人鄉關空入夢離別倍傷神落  
日三峰路東風二月春蒼茫雲樹外獨立望行塵

竹亭玩月再送秋涇

客子未成行坐對竹閒月共此今夕歡終爲千里別後  
夜嬾獨來不因清影缺

坐榮木軒偶成

閑來高館坐斜暉簾外東風氣力微滿地落紅吹不起  
晴空只送柳花飛

城河新濬泛舟

百年廢塹喜渠成一道清流照眼明依舊橋陰容艇過

真從郭裏看潮生李頎詩揚州郭裏見潮生人家忽現樓臺影坊巷  
初聞欸乃聲從此水門應晝啟出城不用杖藜行

收蜂行

晝景遲遲歌枕睡耳畔忽聞風雨至起視羣蜂亂撲簷  
須臾結聚如懸肺人言此是蜂分王收取不早還遠颺  
老夫無事聊作戲剗木為桶安蜂旁長鬚素習豢蜂術  
桶底先教塗石蜜幕以席帽薰以煙闌入其中無縱逸  
初猶勉強就樊籠繼乃棲遲作家室綠陰庭院日暄和  
兩兩三三穴閒出不知何處獵香歸經入新房殊捷疾  
昔時靈邱丈人家年年割蜜為生涯物勞人佚我則愧  
酬勲惟與栽名花茅堂客散讀書倦賸看晨昏兩度衙

寄懷秋涇即次其柬竹町韻

君去繁紅半已空匆匆時序過天中遠離飯稻羹魚地  
重詠車鄰駟馭風暇日高樓應屢上清宵明月與誰同  
思鄉懷友頻西望我亦茫茫目力窮

五月望夜榮木軒玩月

明月不擇地地幽月益佳良宵挈素侶南巷有高齋是  
時夏始半庭院搖疎槐涼颺開我襟清影入我懷舉首  
望虛宇淨若新磨揩留連罄杯杓談笑忘形骸所欣居  
處近未使會合乖惜哉同心子此夕天一涯

時秋涇入秦

池心

池心磐石淨無塵荷葉荷花近遶身終日水禽嘲晰處



晚涼添个苦吟人

男四履孫昂吳校字

著老書堂集卷之七

